



Žene Vjerovjesnika, sallallahu alejhi ve sellem, bile su kod njega kada je došla Fatima, radijallahu 'anha, hodom koji se nimalo nije razlikovao od hoda Allahovog Poslanika, sallallahu alejhi ve sellem.

Aiša, radijallahu 'anha, prenosi: "Žene Vjerovjesnika, sallallahu alejhi ve sellem, bile su kod njega kada je došla Fatima, radijallahu 'anha, hodom koji se nimalo nije razlikovao od hoda Allahovog Poslanika, sallallahu alejhi ve sellem. Kada ju je vidio, izrazio joj je dobrodošlicu: 'Dobro došla, kćeri moja!' Dao joj je da sjedne na njegovoj desnoj ili lijevoj strani, a zatim joj je tajno nešto rekao i ona je jako zaplakala. Kada je vidio njenu žalost, nešto joj je po drugi put tajno kazao i ona se nasmijala. Rekla sam joj: 'Allahov Poslanik te je odlikovao nad svojim ženama tajnom, a ti plačeš?' Kada je ustao Allahov Poslanik, sallallahu alejhi ve sellem, pitala sam: 'Šta ti je kazao Allahov Poslanik, sallallahu alejhi ve sellem?' Rekla je: 'Neću otkriti tajnu Allahova Poslanika, sallallahu alejhi ve sellem.' Kada je umro Allahov Poslanik, sallallahu alejhi ve sellem, rekla sam: 'Preklinjem te pravom koje imam prema tebi, onda kada mi nisi kazala što ti je Allahov Poslanik, sallallahu alejhi ve sellem, rekao!' Rekla je: 'Sada može! Kada mi je prvi put tajno govorio, obavijestio me je da je Džibril do sada ponavljao s njim Kur'an jedanput ili dva puta godišnje, i da ga je sada ponovio s njim dva puta. Rekao je: 'Mislim da mi se smrt približila, pa se ti boj Allaha i strpi se! Zaista sam ti ja divan prethodnik!' Tada sam ja zaplakala i to je onaj plač što si primijetila. Kada je vidio moju žalost, ponovo mi rekao je: 'O Fatima, bi li bila zadovoljna da budeš prvakinja (najpočašćenija) među ženama vjernika, ili prva među ženama ovoga ummeta?', pa sam se nasmijala smijehom kojeg si vidjela."

[Vjerodostojan] [Muttefekun alejh]

Aiša, radijallahu 'anha, kazuje da su supruge Poslanika, sallallahu alejhi ve sellem, bile kod njega kada je došla Fatima, radijallahu 'anha, da ga obiđe u njegovoj bolesti od koje je preselio na Ahiret. Spomenula je da je Fatima stigla hodajući kao što hoda Poslanik, sallallahu alejhi ve sellem. On je uobičavao, kada mu dođe njegova kćerka Fatima, da ustane, poljubi je i postavi na mjesto gdje je on sjedio. On joj je iskazao dobrodošlicu i stavio je da sjedne pored njega. Zatim je Aiša kazala da je tajno kazao nešto Fatimi, nakon čega je ona jako zaplakala. Kada je vidio da se rastužila, on joj je kazao nešto drugo, pa se ona nasmijala. Aiša ju je upitala o tome što joj je Poslanik, sallallahu alejhi ve sellem, kazao, a što nije rekao svojim suprugama, nakon čega je ona zaplakala. Ona je kazala da ne širi tajne Poslanika, sallallahu alejhi ve sellem. Kada je Poslanik, sallallahu alejhi ve sellem, preselio, Aiša je preklinjala Fatimu da joj kaže o čemu se radi. Ona je kazala: "Imajući u vidu da me sada pitaš, kazaću ti."

Kada sam zaplakala nakon prvih riječi, to je bilo zbog toga što mi je kazao da je sa Džibrilom, alejhi selam, učio Kur'an svake godine jednom ili dva puta, a da je te godine proučio dva puta. Poslanik, sallallahu alejhi ve sellem, shvatio je iz toga da mu se približila smrt, te mi je naredio da budem bogobojazna i strpljiva, pa sam zaplakala. Kada je vidio da sam veoma tužna, on me je obradovao da ću biti prvakinja žena ili vjernika u ovom ummetu, pa sam se nasmijala." Ovaj hadis govori nam da se ona nasmijala kada joj je kazao da će biti prvakinja stanovnika Dženneta. Postoje različite verzije u vezi toga šta joj je Poslanik, sallallahu alejhi ve sellem, kazao drugi put, pa se ona nasmijala: 1. Kazao joj je da će ona biti prva iz porodice koja će doći za njim na Ahiret. 2. Kazao joj je da je ona prvakinja Dženneta, što se razumije iz toga da će ona biti prva koja će mu se priključiti, i ovo je odabrano mišljenje. 3. Džibril mu je kazao da ni jedna muslimanka neće imati više potomstva od nje i da ona ne treba da ima manje strpljenja od njih. Ovdje vidimo trud Aiše, radijallahu 'anha, da što prije dođe do znanja, jer je požurila da pita Fatimu, radijallahu 'anha, šta joj je Poslanik, sallallahu alejhi ve sellem, kazao. Fatima je tada mogla samo kazati da ne širi Poslanikove, sallallahu alejhi ve sellem, tajne. Kada je Poslanik, sallallahu alejhi ve sellem, preselio i kada je nestalo razloga zbog kojeg nije htjela otkriti tajnu, ona joj je kazala. Hadis nam govori i o tome šta će se desiti, pa se to i desilo, jer je Fatima, alejha selam, prva iz ehli bejta preselila nakon Poslanika, sallallahu alejhi ve sellem, čak i prije njegovih supruga.

<https://sunnah.global/hadeeth/bs/show/3139>

النجاة الخيرية
ALNAJAT CHARITY

